

I. N. 7.

DISSERTATIO PHILOSOPHICA,

DE

LEGIBUS
NECESSITATI
CEDENTIBUS,

QUAM

Venia Ampliss. Facult. Philosoph. in Reg.

ad Auram Academia,

Publicæ bonorum censuræ submittunt

JOHANNES ARELIN,
PHILOS. MAGIST.

ET

BENJAMIN HORNBORG,
SATACHINDA-FENNO.

IN AUDIT. MAJORI DIE XVIII. DECEMB. MDCCLXVI.

H. A. M. S.



ABOÆ,

Impressit JOH. CHRIST. FRENCKELL.

D. D.

§. I.



Deus T. O. M., hominem condendo primario omnino intendebat Gloriæ suæ manifestationem, qui finis primarius vocari solet. Sed hic finis generalis est, nec ad hominem solum restringi potest, verum ad omnes ceteras res creatas pertinet. Secundarius autem finis, qui etiam specialis dici potest, est felicitas hominis eaque vera, non solum temporalis sed etiam æterna. Hic finis specialiter hominem concer- nit, tanquam ejus capacem. Etenim Deus, ens perfectissimum, non suæ felicitatis ergo opus habuit eum producere; produxit autem, ut BULFINGERUS loquitur: *ex abundantia bonitatis, secundum consilium sapientiae, per liberum potentiae suæ exercitium, ut veræ felicitatis partipem redderet.* Hoc si se ita non haberet, quid opus fuisset animal eximiis illis donis ornare, quibus homines gaudent, nisi ceteris animalibus præstantiore finem sibi propositum haberet. Sed accepit homo, ut verbis utar JOH. GOTTL. „HEINECII intellectum, ut Deum, naturam omnesque verum bonum cognosceret, voluntatem, ut Deo

„vero

„vero bono frueretur, corpus, ut varias actiones,
 „quæ ad adquirendam conservandamque veram felici-
 „tatem pertinent, ederet a). Firmissimum testimoni-
 nium benignissimæ erga genus humanum Divinæ vo-
 luntatis. Idcirco etjam indidit atque inplantavit ho-
 mini, creaturæ præstantissimæ, quemadmodum o-
 mnibus ceteris animantibus, tenerrimum sui ipsius
 amorem atque nisum seu instinctum se ipsum conser-
 vandi & perficiendi. Qui instinctus ita ipsis est im-
 pressus, ut quam primum prodierunt, se exferat, un-
 de CICERO pulchre: *Simul ac natum est animal, i-*
psum sibi conciliatur & commendatur, ad se conservan-
dum & ad statum suum, & ad ea, quæ conservantia
sunt ejus status diligenda; alienatur ab interitu iisque
rebus, quæ interitum videantur adferre b). Neque
 unquam eum deponere possunt mortales, est namque
 pendens ex ipsa animæ nostræ vi immediate, ideo-
 que pellit, instigat atque urget mentem fese deter-
 minandi ad bonum, seu ad nostram statusque nostri
 perfectionem in genere spectatam, quamvis in hoc
 vel illo bono, in specie considerato, eligendo, a re-
 ceta discedat via, & saepe anhelet malum reputans id
 bonum esse, atque a se remotum cupiat bonum, ve-
 re tale, pro malo id habens. Quam rem SENECA
 pulchre exprimit, dicens Epist. 69. *Nullum sine aucto-*
ramento malum est, avaritia pecuniam promittit, lu-
xuria multas & varias voluptates, ambitio purpuram
& plausum & ex hoc potentiam, & quicquid potentia
poteſt, mercede te vita ſollicitant. Quæ quum ita
 ſint, placuit insuper Summo rerum ſtatori, revelare

voluntatem suam hominibus, quæ ipsis esset cynosura ad perfectionem nitentibus atque regula secundum quam se conservarent. Hoc autem factum est vel per naturalem vel per supernaturalem cognoscendi modum. Quam ob rem homines, quamvis instinctu illo ferantur ad sui perfectionem, etjam vi voluntatis divinæ, quæ ipsis lex est, obligati sunt ad se conservandum. Adeo ut, seposito, siquidem fieri id posset, connato illo instinctu, hominibus tamen non licet repudiare hoc officium, quamvis vellent, quin æque poenæ se obnoxios reddant, negligentes hoc officium, ac qui legem in civilibus suo bono latam violant, poena plectuntur. Verum hoc non ita capiendum, ac si perinde esset sive per fas sive nefas hoc fieret. Etenim dum officium hoc injunxit Deus simul præscripsit modum, hoc est, dictavit hoc perfectionibus suis conformiter procedere debere. Adeo ut, si conservatio nostri ipsius aliter obtineri non possit, quam læsis Divinis perfectionibus, tum omnino relinquenda, & fatum quodlibet potius subeundum, quam contra voluntatem ejus quidquam agendum. Hoc ipsum in sequentibus ostendere conabimur. Res est gravis & multis involuta tricis, in quam inquirere proposuimus. Et profecto tantæ difficultatis res est teste SCHUBERTO ut acutissimo judicio opus habeat, qui eam adgredi non absque omni prorsus successu audeat. Multa omnino sunt disputata de hac re, multa itidem possunt in utramque partem disputari; immo, prouti accommodate omnino ad rem dixit HEINECCIUS multæ Dei potius judicio ac misericordia relin-

relinquere, quam ad vivum omnia resecare præstet.

a) *Element. Juris naturæ Lib. I. S. 77.* b) *Lib. III. de finibus,*

§. II.

Ut in legibus exponendis multi simus non est opus, cum eæ in omnibus Moralium Doctorum scriptis explicitentur: tamen, officio nostro exigente, non-nihil primis, ut ajunt, labiis delibabimus, quo sic ea, quæ ad scopum nostrum faciunt exponamus. Est igitur lex in genete accepta: Norma ab Imperante data subditis, secundum quam actiones suas compонere debent. Quum vero Imperans jam sit vel Deus, vel homo, sine difficultate dividuntur Leges in Divinas vel humanas. Illæ iterum quatenus vel hominibus inditæ atque cordibus eorum inscriptæ sunt in prima eorum creatione, vel deinde per sollemnem revelationem iisdem patefactæ, nomen tulerunt ex naturalibus & revelatis. Naturales porro, præter varias alias divisiones, dispescuntur in absolutas & hypotheticas. Absolutæ ~~non~~ nobis eæ sunt, quæ præcipiunt atque determinant illa ipsa officia, quæ homines ut homines præstare debent. Hypotheticæ contra vocantur, quæ injungunt hominibus, in hoc vel illo statu constitutis, hoc vel illud officium, quæque supponunt atque fluunt, ex instituto aliquo, sive illud Divinum sit sive humanum.

§. III.

Ut etiam necessitatis, quæ nostræ nunc est considerationis sufficiētem adsequamur ideam, nonni-

hil de eadem quoque est proferendum. Itaque mox
observamus, tres in genere circumferri necessitatis
divisiones, puta ratione adjuncti, gradus & subjecti.
Ratione subjecti audit vel publica vel privata: hæc
non illa hujus loci est. Ratione gradus iterum in com-
munem, gravem & gravissimam sive extremam a).
Communis est illa, quæ passim occurrit pauperum;
gravis est, quam incurrint, qui non habent neces-
saria ad suum & suorum statum & conditionem;
gravissima sive extrema est, quam quis patitur cum
probabili mortis periculo b)). Alii vero dicunt neces-
sitatem, quoties vitæ imminet periculum, extremam,
qualis necessitas erat Martyribus, quibus aut dirissi-
mum subeundum supplicium aut Christo maledicen-
dum erat; vel quoties periculum, quod adest, vitam
non spectat; pro magnitudine illius, necessitas ma-
jor minorve est c)). Ratione adjuncti denique divi-
idunt Moralium Doctores necessitatem, ut sit aut ho-
nestatis, aut commoditatis, aut incolumitatis. Ho-
nestatis ipsis est, qua quid necesse est, si honeste, i.
e. legibus convenienter vivere velimus, commodita-
tis autem qua quid ideo necesse est, ut commode seu
sine incommodo vivamus. Neutra hic in sensum ve-
nit. Necessitas incolumitatis ergo nostræ jam est con-
siderationis. Quod ad indolem hujus necessitatis at-
tinget & quando ita comparata erit, ut legis trans-
gressores excuset, tria requirunt moralium Doctores.
Primo, statuunt eam ratione gradus debere esse ex-
tremam, hoc est, quod vita periclitetur. Hoc nisi
ad fuerit requisitum, hanc facultatem ipsi non tri-
buunt

buunt d). Neque hoc immerito. Nam alias aliis et jam gradibus necessitatis hoc adserendum esset, ad eoque homines vel necessitatis specie permoti, proterve atque impudenter transgrederentur tam Divinas quam humanas leges. Verum in aliis illis gradibus necessitatis constitutis, multæ suppetunt viæ elabendi atque vitandi periculum sine læsione alicujus legis, quod tamen in extrema non datur. Unde clarum est, quod extrema necessitas sola hic locum habeat, ceteri gradus non. Huic contrariam fovet Celeb. JOACH. GEORG. DARIES sententiam existimans extremam necessitatem huc non adnumerari debere, sed quidquid de favore necessitatis dicitur ad hypotheticam referri e). Deinde requirunt circa indolem necessitatis legem suspendentis, ut non nisi his admiculis superabilis sit, ad quæ arripienda impellimur. Etenim ubi alia media adhiberi potuissent, quæ aliis non sunt molesta, eos nondum esse in statu extremae necessitatis. Tandem inter requisita numerant, ut necessitatem illam ipsi malitiose aut petulanter non attraxerimus, quæ PUFFENDORFFII est sententia f). Sed hoc requisitum sibi non constare, nec universaliter poni posse arbitramur. Atque his sic præsuppositis facile est dictu, quid per necessitatem incolumentis intelligatur: status nimirum ille hominis, in quo legi sine periculo suo parere non potest.

- a) AND. AD. HOCHSTETTERI Colleg. Puffend. exercitatio 5. p. m. 233. b) BONACINA in Theol. Mor. Tom. II. Tract. I. diss. 3. p. 162. Cit. Hochstett. pag. 234. c) HEINECCIIUS lib. cit. §. 157. d) TREUERUS ad Puffend. de Off. bom. & Civ. Lib. I. Cap. 5. S. 23.

f. §. 23. e) *Institut. Jurispr. Univ.* §. 269. Sch. f) *Jus N. & G.* L. 2. C. 6. S. 5.

§. IV.

Jam dispiciendum nobis venit: An omnes leges ejus sint indolis ut legi conservationis cedant vel minus? vulgo omnino jactant, necessitatem non habere legem eaque regula sic utuntur, quasi nihil tam scelestum esset, quod necessitas non excusaret. Sed si hoc per omnia verum esset, absurde omnino erga se ipsum fecisset JOSEPHUS qui vitæ libertatisque periculum adire maluit, quam libidinosæ consentire heræ voluntati. Et quod ad divinas attinet, quæstio suboritur: An eæ ita comparatæ sint, ut licite atque impune violari possint? Quod quasdam transgredi liceat in casu necessitatis, apertissime elucet ex violatione Sabbathi tempore necessitatis, Matth. 12: & similibus. Verum an omnes liceat alia est quæstio, ad quam negando omnes quantum novimus respondent; & quidem jure meritoque. Ut vero eo felicius isthanc quæstionem resloverent eruditi, distinxerunt leges negantes ab affirmantibus; has violari posse, illas non item contenderunt. Eam imprimis adferunt rationem quod præcepta negantia obligent quovis temporis momento, vel ut Scholastici, citante CAPSPAR. ZIEGLERO, proponunt: præcepta negantia semper obligant & ad semper. Affirmantia autem præcepta obligant quidem semper, sed non ad semper, sive pro quovis temporis Articulo, sed tum demum, cum præsto est objectum, & tale, quale præceptum exigit, ut actiones circa illud exerceri oporteat

teat a). Sed pace Virorum Celeberr., hæc sibi non constare existimamus. Namque dum perpendicularis præceptum affirmative prolatum: *Deus super omnia colendus*, non audemus statuere illud minoris validitatis esse, quam si negative exprimeretur hoc modo: *nemini, nisi Deo soli cultus Divinus est babendus*. Nec ausim dicere, illud affirmans non obligare ad semper, sive quovis temporis articulo; nequit enim produci ullus unquam temporis articulus, quo obligatione hujus præcepti implendi solutus sit quisquam mortalium. Nobis igitur videntur Eruditi hujus theses defensores: quod negantia præcepta validiora sint affirmantibus, oblieti ejus rei, quod termini, quibus præceptum aliquod effertur, ad validitatem unius præcepti præ altero nihil faciant; sed validitas omnis, si quæ in uno præcepto datur præ altero, uti omnino datur, aliunde est deducenda. Cum hoc certissimum sit, quod in unoquoque præcepto utrumque contrariorum re ipsa contineatur. Et quoniam contrariorum contraria est consequentia, utique prohibetur id cuius contrarium imperatur, & viceversa. Sic dum Deus jubet parentes honore affici, prohibet simul ne quis in eosdem sit injurius. Pari ratione, dum prohibet, nomen suum in vanum assumi, jubet nomen suum sancte haberi, & sic in ceteris. Existimant porro, quibus hæc divisio legum in negantes & affirmantes in deliciis est, negantes leges unquam sine ignominia Dei migrari posse, puta eam ob causam, quod, Deus dum rem quamcunque prohibuit Majestatem suam exercuerit, quod tamen de affirmantibus non valere autumant b). Verum quam infirmis hæc nitatur

tur sententia talis, facile est perspectu, modo ad ea at-
tendatur, quæ mox attulimus de affirmatione & nega-
tione in legibus simul contentis. Præterea, quod ad
id attinet, quod Deus Majestatem suam singulari ratio-
ne manifestaverit in legibus negantibus proferendis, i-
tidem a vero esse alienum, non sine ratione nos statue-
re posse putamus. Nam frustra omnino est, dicere le-
gislatorem, cuius in potestate est & prohibere & præ-
cipere rem quamcunque in majori splendore ostendere
Majestatem suam prohibendo quam præcipiendo hanc
vel illam rem. Hoc clare elucet, si attenderimus ad
notionem legis in genere, quæ est norma ab imperan-
te præscripta subditis, secundum quam actiones suas
componere debent. Unde clarum fit, quod ubicunque
lex datur ibi quoque detur imperans sive superior, at-
que civitas sive societas. Imperans autem is est, qui
jure pollet disponendi de actionibus aliorum; actiones
igitur inferiorum constituunt objectum legum. Harum
actionum alias committi, quasi dicas ad existentiam
perduci, alias autem omitti; seu abesse jubeat impe-
rans necesse est. Hinc descendunt nomina actuum com-
missivorum & omissivorum, & leges, quæ circa actus
commisivos versantur ajentes sive præceptivæ, quæ au-
tem omissivos pro objecto habent, negantes audiunt.
Hactenus igitur nulla ratio fuit, cur alteri jus præce-
dentiæ præ altera asteratur, nec alteri major validitas
præ altera, adjudicanda. Adeoque qui ajentes trans-
greditur leges reus fit poenæ æque, ac, qui contra ne-
gantes agit.

a) Nota in Hug. Grot. de Jur. belli & pacis.

b) HEINEC-
Clt

CII Praelection. in Puffend. de Offic. Homin. & Civ. Lib. I. Cap. 5. §. 18.

§. V.

Nobis quæ hæreat mens paucis indicabimus. Cumque nobis non arrideat, ob allatas in præcedenti §. rationes, distinctio legum in negantes & ajentes, licet a magni nominis Viris jam dudum approbata atque defensa, utpote GROTIO, PUFFENDORFIO aliisque eorum sequacibus; factum est, ut amplexaremur aliam satis cognitam, puta distinctionem in absolutas & hypotheticas, utpote naturæ rei proprius accedentem. Sic enim putamus hanc rem optime confici posse, quemadmodum teste Celeberrimo J. F. BUDDÆO a) retenta hac divisione facilime se ex omnibus difficultibus expediunt, qui in rerum moralium indagatione sudant. Quamobrem contendimus leges Divinas absolutas ita esse comparatas, ut eæ, quemadmodum de negantibus asserunt earum defensores, nunquam sine ignominia Dei migrari possint. Namque in memoriam nobis revocantes, quod legis alicujus validitas, eam ob rem, nec intendatur nec remittatur, quod terminis negantibus prolatæ sit, sed alia requiratur necesse est causa validitatis ejus majoris præ altera. Hæc autem nulla alia est, ut opinamur, quam proprietor vel remotior nexus cum fine societatis: vel, validitas unius legis præ altera inde æstimanda, quod illa, majori cum effectu concurrat ad finem societatis, quam hæc, adeoque illa proprius quippe collineans ad finem, maiore religione observanda, quam altera illa, longiori via, ad illum ducens. Quod vero leges Divinæ absolutæ e-

jus sint indolis, nullum est dubium, quippe præcipunt
 & determinant ea officia, quæ homines, ut homines,
 præstare debent, §. 2. vel, nihil aliud ponunt ad obli-
 gationis effectum quam quod homines simus. Unde
 prono fluit alveo eas adeo necessarium habere nexum
 cum natura hominis, ut illis migratis, hæc damnum
 patiatur. Videlicet, observatio harum legum eos red-
 dit felices, & quo magis iis adhærent, eo propius ad
 felicitatis perveniunt culmen; & contra vel minima di-
 gressione a norma præscripta, felicitatis faciunt jaectu-
 ram ac miseriam adaugent suam. Accedit, quod Deus,
 Auctor tam hominis naturæque humanæ, quam legum
 naturalium, considerit homines voluntati suæ confor-
 miter atque dederit ipsis has leges, iisque incluserit
 ea, quæ homini optima convenientissimaque essent at-
 que insuper injunxerit has observandas. Verum vo-
 luntas ejus, ut & cætera attributa Divina, est immu-
 tabilis, sunt etiam leges Divinæ absolutæ omnis muta-
 tionis expertes. Qua de re CICERO alicubi bene, ci-
 tatus ab HEINECCIO b): „Huic legi nec abrogari fas
 „est, neque derogari ex hac aliquid dicet, neque tota ab-
 „rogari. Nec vero aut per senatum, aut per populum
 „solvi hac lege possumus. Neque est quærendus expla-
 „nator, aut interpres ejus alius. Neque erit alia lex
 „Romæ alia Athenis, alia nunc alia posthac, sed & o-
 „mnes gentes & omni tempore una lex continebit, u-
 „nusque erit communis quasi Magister & Imperator o-
 „mnium Deus, ille legis hujus inventor, disceptator,
 „lator. Hinc, si quis sibi sumferit has leges transgredi,
 contra voluntatem ejus ageret adeoque rebellis esset,
 per

per consequens maximam Deo inferret injuriam atque contumeliose nimis se gereret erga Majestatem illius. Omne vero id, quod ignominiam Dei importat, longe a nobis abesse debet, quibus incumbit, ex toto corde, ex tota anima, & ex omnibus viribus Deum amare, & quantum penes nos est gloriam ejus promovere. Unde palam est, quod nullus detur casus, in quo harum observatio omitti possit. Nulla tanta concipi potest necessitas, quamvis maxima, nullum periculum, nullum discrimen vitæ, membrorum, famæ, viætus aut amictus, vel quoconque veniat nomine, quæ excusent homines harum legum transgressores, quin rei fiant pœnæ severissimæ, damnumque longe maximum sibi attrahant. Hoc ipsum inculcat etiam Salvator noster dulcissimus Matth. 10: 28.

Ait de hypotheticis aliud pronunciandum. Hæ enim, cum non adeo necessarium cum natura hominis habeant nexum, quin homines sine iis utcunque conservari possent, & quod conservati sint patet exemplo primorum nostrorum parentum, violationem tolerant certis in casibus. Et quid miri, nituntur namque certis institutis §. 2. instituta autem prodierunt cum commodum aliquod magnum acquirendum esset, vel circumstantia oriretur hominum conservationem impeditura, atque tum instar mediorum sunt. Media vero usurpanda esse, si finem intentum obtinere voluerimus, quisque videt; sed itidem clarum est, ubi mediorum alias ad finem perducentium observatio nobis impedimento est, certis exorientibus circumstantiis, vel in nostram vergit destructionem, ea non esse tum

habenda pro mediis; esse igitur relinquenda, tanquam quæ his in casibus, non contineant rationem cur finis consequatur. Necessitas ejusmodi est, quæ tollit rationem cur finis intentus amplius obtineri nequit, nam est status, in quo legi sine periculo suo parere non potest homo.

§. 3. Quam ob causam facilis est conclusio, quod institutis in statu necessitatis, suo officio non fungentibus, etjam leges, vim suam amittant obligatoriam, adeoque eas impune transgredi licet.

a) *Theol. Mor. Pars 2. prol. §. 2.* b) *Elem. Jur. Nat. & Gent. Part. I. §. 17.*

§. VI.

Hæc ut clariora evadant, unum atque alterum officiorum exempli loco proferemus, assertionem nostram illustraturi. Qnod ad officia erga Deum attinet, sunt ea, quemadmodum erga nos ipsos & alios vel absoluta vel hypothetica. Illa ejus sunt indolis, ut iis solvi nequeat homo, quamdiu homo est, in quo demumcunque constitutus sit statu, vel quibuscunque circumdetur circumstantiis: hæc vero talia sunt, ut, certis exorientibus circumstantiis, conservationem humani generis, vel hominis pessundantibus, eorum omissio non imputetur. Nec alio modo se habere possunt, quia leges absolutæ, quæ præcipiunt officia ejusdem nominis, sunt immutabiles; hypotheticæ contra mutationis obnoxiae §. 5. Exemplo nobis sit abstinentia a blasphemia DEI quæ in eo consistit, quod homo blasphemus ei tribuat imperfectiones a natura ejus abhorrentes. Hæc vero, puta abstinentia a blasphemia, ejusmodi officium est, ut necessitas quantacunque sit, non excu-

excuset ejus neglectum. Et qui excusaret, cum hæc apertissime cultui DEO debito contrarietur. Deum enim tenemur amare, tanquam optimum, omnisque boni auctorem & datorem; timere tanquam potentissimum, & cujus offensa maximum sit malum conciliare apta; ei in omnibus humillime obsequi tanquam Creatori, Domino ac Rectori optimo, maximo, & sic in ceteris. Hanc violationem haud immerito taxarunt omni ævo homines quilibet probi. Ita, de scriptoribus Christianis proditum est memoriae: de gentilibus oculatioribus, suis hanc insaniam exprobrantibus nos eruditivit **HEINECCIUS**. Laude igitur est dignissimus **DANIEL**, Propheta ille, qui ne latum quidem unguem a Deo vero colendo decepsit, licet maxima sibi imminere viderit mala. Laudandi itidem sunt maxime Fratres illi, de quibus mentio fit: 2 Maccab. 7: quod, licet mortis intentata poena jussi essent carnem suillam edere, tamen renuerint, atque potius præclaram mortem obierint, quam Divinam transgrederentur legem. „Tamen quamvis se excusare nequeant, „qui quid tale admiserunt necessitati succumbentes, „non tamen permittit humanæ imbecillitatis sensus, ut „eorum vicem non doleamus, quos a constanti proposito dimovit imperiosa necessitas; quum noverimus ipsi Petro, Christum Servatorem neganti, datam esse veniam, quando eum facti pœnituit, Matth. 26: 75. sunt verba **HEINECCII**. Hæc de absolutis, jam etiam hypotheticum aliquod officium proferemus, vide licet officium, Sabbathum sanctificandi, seu diem, quæ cultui Numinis ejusque beneficiis recolendis est destinata.

nata. Hoc officium, utpote instituto nixum, est quidem, rationi supernaturali revelatione destitutæ, incognitum; atramen non est id rationi humanæ contrarium, quin potius eidem quam maxime consentaneum, siquidem probe utique perspicit, esse Deum externo quoque cultu dignum, certumque quoddam tempus huic actui consecrari debere. Notum jam supponimus sanctificationem sabbathi institutum esse, quemadmodum revera est, quod vel inde patet, quod initio novi foederis hic actus peragendus translatus sit, a septimo ad primum diem hebdomadis. Ideoque calculos alia ratione subducere nequimus, quam, quod omnia ea, quæ hominis veram tranquillitatem atque pietatem impediunt, non autem, quæ ad ejus conservacionem ac felicitatem pertinent prohibita & interdicta sint. Per consequens, conservatione periclitante, licebit officium hoc intermittere tantisper. Hoc etiam Salvator noster in secula benedictus, reprehensus a Judæorum Magistris, quod die sabbathi opera caritatis atque necessitatis non intermitteret, ostendit & explavit, addita ratione sufficientissima, quod homo non sit creatus ob sabbathum, sed sabbathum institutum sit hominis ergo.

§. VII.

Quod ad officia erga alios attinet varias de non-nullis specialibus casibus fovent eruditæ sententias. Generatim quidem omnes statuunt & contendunt, dum ipsis de officio primo absoluto sermo est, neminem esse lædendum: sed in applicatione ad certos casus videlicet

dentur, quasi obliiti perfectæ illius obligationis, aliquid huic detrahere. Et ne quam ipsis injuriam facere videamur, placet proferre rationes PUFFENDORFII circa casum illum tristissimum, quem ZIEGLERUS ad GROTIUM Lib. 2. C. I. §. 3. ex NIC. TULPIO in *ob serv.* Medicin. refert. Heic namque clarissime ostendit se laudatus auctor consentire illis, qui estimant officia absoluta omitti posse in casu necessitatis. Verum, ut de re præsenti judicium ferri possit, historiam facti enarrare lubet. Septem Britanni accinxerant se in insula Christopheriana unius solummodo noctis itineri, ultra quam non extenderant commeatum; at interveniens tempestas abripuit imparatos longius in mare, quam ut potuerint reverti ad portum ante diem decimum septimum. Luctatum igitur est cum inedia, quæ eo ipsis fuit gravior, quo ardenter id temporis affluavit Sol, & vehementius exsucca eorum guttura exarefecerit exhalans incalescentis maris salso. Cum intricati erroris nullum finem promitteret spatiosum mare, anticipati sorti committebant, cujus carne urgentem famem & quo sanguine compescerent inexplicabilem sitim: jacta est alia, qua ex illis unus cœdi destinatur, qui lubenter fortunæ cessit, & gavisus est, se post mortem amicis esse profuturum, deinde sorte alius reperiebatur, qui jugulare peteret & vim volenti inferret, & quæ sequuntur. Circa factum hoc navigantibus vitio id vertit C. ZIEGLERUS, quod in mortem unius & quisq; in se conspiraverint atque periculum corporis, periculo animæ anteposuerint. Nemo enim debuit vitam suam tam vilipendere, ut ejus jactura alterius famem expleret.

Nec reliqui ideo in socium suum s̄avire debuerunt, ut
 stomacho suo consulerent. Quamvis, quid his oppo-
 ni possit, non videamus, PUFFENDORFIUS tamen ^{a)}
 his non contentus contrariatur; sed an protulerit a-
 liquid magni momenti, judicent alii. Dicit namque:
 aspere nimis dici, in mortem alterius conspirasse,
 qui forte ducendum censent unum, ut reliqui fer-
 ventur, qui alias omnes simul misere erant perituri.
 Unde nec animae periculum heic fuisse metuendum.
 Illum animam suam vilipendere, qui citra necessita-
 tem eandem projicit. Nec s̄avitiam dici posse, ubi
 in salutem omnium qui moritur, minori cum dolo-
 re ferrum jugulo excipit, quam alter infigit. Hæc
PUFFENDORFIUS. Et si dixerimus, quid nos de
 hac re sentiamus, lubentissime profitemur nos ZIE-
 GLERO assentiri, atque id eo magis, cum par esset
 omnium conditio ac necessitas, quæ omnes æque
 pressit, nec quisquam suam calamitatem majorem
 aliena judicare posset. Adeoque nulli erat jus in a-
 lienam vitam, ut hanc eriperet alteri, se ipsum con-
 servaturus, quia æqualis adversus æqualem nullo fa-
 vore utitur. Sed nec ipsi jus in propriam vitam est,
 quin in cædem sui ipsius consentiens, æque peccet,
 ac qui alium occiderit. Alia autem res est, si plu-
 res in scapham insiluerint tempore necessitatis, unus
 post alterum quæ tamen scapha tam multorum non
 esset capax. Tum omnino post insilientes depellere
 licet. Ratio hæc est, quod qui primi scapham occu-
 parunt possessores ejusdem sunt, adeoque jure suo ab
 illis privari nequeunt, qui post insiliunt, licet cum
 eodem

eodem periculo luctantibus. Quid, quod minus mai-
tum est, omnes fateantur necesse est, aliquos perire
quam omnes. Quemadmodum autem læsio aliorum
vetita est, ita defensio sui, ubi res eam postulave-
rit quam maxime injuncta est. Sed neque hoc omni-
bus placet. Distinguunt hie inter leges permissivas
atque præceptivas, prioribus legibus hanc defensio-
nem inniti contendunt non posterioribus b). Adeo-
que defensionem, licitam esse non absolute sumtam,
sed si consideretur in relatione ad aliud aliquid bo-
num, e. g. si periculum est eripiendi præsidii fami-
liae nostræ, tum licitam esse, immo præceptam de-
fensionem sui ipsius, quæ tamen, eo casu, non est
sui ipsius, sed aliorum. Quod an recte se habeat,
valde dubitamus. Nam, ut jam nihil dicamus, de
legibus, quæ permissivarum nomine condecorantur,
an vere tales sint vel minus, tantum observamus,
quod quemadmodum conservatio nostri, nobis in-
juncta est absolute, sine omni respectu ad hanc vel
illam rem, defensio nostri ipsius etiam absolute sit
præcepta. Contradictionem enim involveret statue-
re conservationem absolute esse præceptam atque si-
mul contendere defensionem relative tantum injun-
ctam, atque in nostra sitam voluntate, utrum eam
fuscipere velimus, nec ne, adeoque nos in uno eo-
demque actu simul peccare & non peccare. Sed si
dicendum, quod res est, DÉUS nobis injunxit con-
servationem nostram tanquam finem, ideo non po-
tuit non etiam præcipere defensionem tanquam me-
diūm. Hinc etiam clarum est, quod quamvis de-

fensio, læsioni attemperata esse debeat, adeo ut, si ad graviora remedia provolaverimus, ubi leviora sufficerent, peccati rei siamus: tamen in necessitate constituti summa, eo usque progredi licitum sit, ut etiam mortem accelerando invadenti, aggressionem avertere possimus. Et si quid mali aggressori quis putet acceleratum esse, non id imputet defendantis, sed aggressori ipsi c). Nullum enim ei est jus ad alterum invadendum aut occidendum; nec e contrario nulla invasio est obligatio tolerandi injuriam ab altero illatam, multo minus mortem sine reluctantia subeundi. Qui, igitur in doctrina morali judicant injustum invasorem, quem effugere non licet, non debere prosterni, sed oportere permitti ut crimen necis committat; ii quidem videntur docere, plus debere amari inimicum quam seipsum; & per consequens ultra terminum lege Divina præscriptum atque a Salvatore explicitum extendunt modum seu mensuram amoris proximo debiti. Accedit, quod, qui reipsa parcit vitæ invasoris talis, & suam vitam sic profundit, is non solum non observet modum amoris præscriptum istum, sed etiam conservet perniciosum instrumentum ad alias quosvis homines necandos aptum; immo quasi acuit & informat illud, ut habitu occidendi contracto magis magisque perniciosum fiat. Bene igitur NICETA in vita ALEXII COMNENI: citante TESMARE dicit: *ne-
mo nefas putare debet, suam salutem propugnare, &
ictum hostilem antevertere.* Neque populari suo, stri-
eto ense mortem minitanii parcendum est. *Quisquis no-
cer,*

cer, hostis habeatur, qui occisum it, occidatur. Vā
 nus igitur est eorum labor, qui comparationem in-
 stituunt, inter vitam aeternam invadentis & vitam
 temporalem invasi, cum adeo incertum sit, an non
 nostram salutem, hujusmodi in statu constituti, pe-
 riculo exponamus, si tum vita nos privari patere-
 mur. Igitur omnis, quæ instituenda est compara-
 tio, locum habet, inter jus invadentis ad vitam in-
 vasi, & invasi jus ad se defendendum, illud vero nul-
 lum esse jam significavimus, eam ob caussam non
 potest non actio invasi locum habere. Nec minus
 torsit Moralium Doctores, quæstio: an in casu ne-
 cessitatis res alienas auferre & in usus suos conver-
 tere licitum sit. Magna animorum commotione de
 hac re disputatum est, aliis affirmantibus aliis iterum
 negantibus. Sed a quorum partibus veritas pugnet
 facile est perspectu, modo perpendatur, quo loco
 referenda sit lex, de non auferenda re aliena, an in-
 ter absolutas vel hypotheticas locum habeat? Quod
 ad hypotheticas jure referatur nullum est dubium,
 quia hæc lex nititur instituto dominii. Ante enim
 institutum dominium nullæ reperiebantur res pro-
 priæ vel alienæ, sed tum primum exorta est distin-
 ctio inter meum & tuum. Nec ante dominium in-
 troducedum dici potuit quisquam furtum fecisse, vel
 res alienas abstulisse. Quæ cum ita sint, faciles eis
 adjicimus nostrum calculum, qui affirmantem tuen-
 tur sententiam. Nec moramur furti vocabulum,
 quod negantes ad suam hypothesis incurrstandam ac
 colorandam heic adhibent. Si enim genuinam no-

bis formaverimus ideam furti, quod quidem est ablatio rei alienæ, inscio atque invito domino, propter lucrum facta, cum proposito celandi facinus; facile patet illud toto cœlo differre ab usu rei alienæ in casu necessitatis, propter vitam sic & non aliter ab interitu vindicandam. Nempe furtum maxime est improbandum & abominandum; ast de alterius istius ablationis genere idem non valet. Etenim omnibus incumbit commoda aliorum promovere, alterumque ubi res ita tulerit opibus suis juvare, atque ad hoc obligati erant homines antequam dominia introducta erant. Introducto vero dominio rerum hæc obligatio minime cessavit, quin æque nunc viget ac antea. Adeoque homo habet jus, quamvis imperfectum, ad postulandum ejusmodi officium ab altero; quod jus, accedente necessitate in perfectum abit; ita ut, hocce officium deneganti vi extorque ri queat. Ille itaque cui ejusmodi jus competit atque eo utitur, nulli facit injuriam, cum ea sibi vindicet, quæ ad eum jure pertinent, ab alio vero in juste detinentur. Serius nimis est CASPAR ZIEGLERUS in hac re neganda d). Dicit enim nullam tantam esse necessitatem famis, quin possit vel labore vel emigratione & mutatione soli aut levari aut evitari. Sed pace Viri Celeberrimi dixerim, ubi hæc suppetunt media elabendi, necessitatem non esse extremam. Præterea, si in necessitate constituti vitam suæ conservationis ergo, alteri eripere possunt; quidni eis competit jus ad bona aliorum fatali ejusmodi casui succubentibus. Insuper monet, dispiciendum esse,

esse, utrum talis homo in necessitate constitutus, propria culpa in ejusmodi inciderit statum vel minus. Hanc etiam esse PUFFENDORFII sententiam, supra monuimus, cum in §. 3. enumeraremus requista necessitatis transgressionem legis excusantis. Sed neque hoc aliquid ad rem facit. Ponamus licet, aliquem, summam sibi attraxisse miseriam, vel bona sua imprudenter dilapidasse, non tamen ideo dicendus est jus suum amisisse ad auxilium aliorum exposcendum, atque ubi id ei denegatum fuerit, vi idem sibi vindicandum, & id eo magis cum jam pœnam ferat gravissimam insipientis atque stultæ suæ vitæ anteactæ e). Sed missis circumstantiis, quæ hic adferri solent, tantum dicimus atque contendimus, quod si quis, in statu necessitatis constitutus vide defendere possit, atque eo usque progredi ut etiam vita alterum privare ei concessum sit, nihil impedire, quo minus, alteri in summa necessitate constitutus, necessaria ad vitæ conservationem eripere possit. Inter duo enim mala, quod minus est, eligendum esse omnes contendunt. Mors autem hominis, atque damnum rei cujusdam possessæ dum conferuntur, mortem longe majus malum esse, quam rei amissionem fateantur necesse est omnes. Quid igitur impedit, quo minus res alienas arripiamus, cum nulla alia ratione interitum evitare possimus; mutuamur enim tum, non vero crasse auferimus rem alienam, quia cessante necessitate etiam indemnem præstituti sumus illum, cuius re sic salvi ex periculo evasimus.


- a) *Jur. Nat. & Gent.* Lib. 2. C. 6. §. 3. b) *ZIEGLERUS*
 in not. in *Grot. de Jur. belli & pacis* Lib. I. Cap. 3. §. 3. c)
ISR. GOTTL. CANZII Discipl. Mor. Traet. I. Cap. 3. §. 213.
 a) *I. c. Cap. 2. §. 6.* e) *Barbeyrac in not. ad Lib. PUFF. de*
Off. hom. & civ. Lib. I. Cap. 5. §. 30.

§. VIII.

Ad leges civiles etiam pedem promovemus, visi-
 furi an eæ cedant necessitati vel minus. Intelligi-
 mus autem per leges civiles, normam a Summis
 Imperantibus, in quacunque civitate latam, de a-
 ctionibus externis subditorum ad decus & utilitatem
 componendis. Earum itaque, nomine veniunt non
 tantum eæ, quas ipsi summi Imperantes tulere, sed
 quas etjam aliunde adsumtas,aprobarunt, & vim
 legum habere voluerunt, modo, quod voluerint,
 constet. Hæ ita comparatæ erunt, ut commodum
 reipublicæ pro fine habeant. Hanc enim ob causam
 homines in societas atque respublicas con-
 fenserunt, puta, ut securitate frui possent. Quid,
 quod securitatem tanquam finem societatis respi-
 ciant etjam latronum cœtus. Hæc est ratio,
 cur Imperanti contulerunt potestatem actiones i-
 psorum dirigendi. Imperantis igitur est civium
 commodum promovere quantum fieri potest. Scien-
 ter atque nervose & Legislatoris officium & Legis
 servandæ conditionem exprimit CICERO, dum di-
 cit: *Omnis leges ad commodum reipublicæ referre o-
 portet, & eas ex utilitate communi, non ex scriptiōne,
 quæ in litteris est interpretari. Ea enim virtute &*
sapien-

sapientia Majores nostri fuerunt, ut in legibus scribendis nihil sibi aliud nisi salutem atque utilitatem proponerent, neque enim ipsi quod obesse scribere volebant, & si scripsissent, quum esset intellectum, repudiatum iri legem intelligebant. Nemo enim leges legum causa salvias esse vult, sed reipublicæ. Hinc etiam sequitur, quod eæ non ferendæ sint alio modo, quam quo & solent & debent, puta ratione habita imbecillitatis humanæ. Ita si se habuerint, quam firmissime obligant homines ad obsequium; uti contra, si non ad conditionem humanam sunt attemperatae, sed onus injungant, quod a natura & ratione abhorret, vi obligandi destituuntur. Unde facile est perspectu, quod, quemadmodum felicitas societatis est finis, quem leges intendunt, ita etiam, hac periclitante, illæ nullam admittunt exceptionem, quantacunque necessitas premat. Quis igitur excusaret militem in excubitis negligentem, aut fuga suæ saluti consulentem, periculo imminentे toti exercitui aut societati. Hoc enim in casu mors ipsi potius subeunda ut salus universorum sarta rectaque maneat. Hanc ob causam gravissimas proponunt penas Imperantes eis, qui salutem privatam saluti publicæ anteferunt. Sic præsidio decedere apud Romanos capitale fuit, Liv. 24: 37. Atque id jure optimo, nam ejusmodi hominis vigilantiæ totius exercitus atque societatis salus commissa est, ubi periculum ab hoste imminet. Hoc casu excepto nullus datur casus, quo non necessitas superet legem. Latæ enim sunt leges hæ in communum & singulorum & universorum. Nullum inde

commodum redundaret sed quam maxime fini civitatis id refragaretur, si cives promiscue obligati essent, salute civium id non postulanter ad mortem subeundam. Etenim cives quidem transtulerunt in Imperantem jus vitæ & necis, sed sub conditione, si salus publica id postulat. Accedit, quod si leges Divinæ quædam suspendi possunt, certis in casibus, prout jam ostensum est, quid mirum, leges quoque humanas, certis id urgentibus circumstantiis vim & rigorem aliquando amittere.



THES. I.

Uti res agraria a gentibus humanioribus omni ævo culta atque æstimata est: ita a barbaris neglecta atque contemta deprehenditur.

II.

Quemadmodum non ex quovis ligno sculpitur Mercurius: ita non quævis Regio quaslibet producit res. Qui igitur cum successu œconomum agere avert, notitia tam regionis, quam rerum in regione illa producendarum gaudeat, necesse est.

III.

Scientia œconomica omnino magna, in Patria, non magno temporis spatio, cepit incrementa, tamen optandum est, ut melius ad eum diffundatur, cui fors obtigit aratrum tractare, & qui maxime religioni ducit majorum inhærere institutis.

IV.

IV.

Naturæ scrutatores ab imperitis plerumque albis, ut ajunt, irridentur dentibus; quamvis re ferius penitata eodem honore digni sint, ac qui multis milibus humanum genus donaret.

V.

Qui unam ex œconomiæ partibus, quæ sunt res rustica, metallica, fabrica & commercia præ alia collendam censem, perinde mihi agere videntur, ac si architectus domum exstructurus primum sollicitus esset de uno angulo exstruendo, ceteros dein data occasione ædificandos urgeret.

VI.

Qui terram proscindunt a limite dimensi semper incipientes eandem formant foveosam. Et nisi contrariam dimenso induerint formam, tam laboris ei impensi, quam seminis terræ commissi, ejus cultores pœnitibit.

VII.

Machinarum, quibus res aliqua ea conficitur celeritate, ac si multi homines operi illi manus præberent suas, usus, in republica hac vel illa maximus est, in alia vero minus utilis putatur.

VIII.

Rationes omnino hactenus prostantes semen autumnale mature terræ committendum svident, verum experientia nondum evictum opinamur, utri sibi melius consulant, qui mature, an qui ferius hoc fecerint.

IX.

Prudentia haud vulgaris requiritur ab œconomo
in eligendo pecorum genere ad prædium aliquod ru-
sticum alendo. Nam non omne genus ad omnia præ-
dia cum emolumento debito ali potest.

X.

Prata sua, qui voluerit fructiferiora reddere,
quam ea nunc reperiuntur, optime & minori sumptu
proficiet, si suginam tempore autumnali circumspex-
erit, modo caverit, ne humiditas nimia sibi obstet.

XI.

Quod cives de mercibus atque rebus in patria
confectis & intra ejus limites invehendis atque ave-
hendis vectigal pendant, æquum omnino est & ju-
stum: An vero ratio, quæ in patria obtinet id exi-
gendi, eidem proficia sit, rationes haud prole-
tariæ, nobis dubitandi ansam præbent.

S. D. G.

